

四庫全書

集部

欽定四庫全書

集部

澗泉集卷十九

二十九

詳校官庶吉士臣吳烜

主事臣呂雲棟覆勘

謄錄貢生臣王敷

謄錄監生臣龍舜耕

欽定四庫全書

澗泉集卷十九

宋 韓流 撰

七言絕句

山中

屋前流水水邊山
山水中間十載間
一旦塵埃撲雙鬢
薰風吹雨鳥關關

廟山佇舟閒賦

烟雨錢塘江上山
客懷舟楫往來間
誰云朝市無清致

除却利名渾可閒

南隴步入北隴

一塘春水野花間
田缺溝流轉草間
正是冷煙寒食後
蝶飛飛去鳥關關

春山

春風今已到春山
花動春林縹緲間
畫出詩篇在其表
惜春心事幾分閒

初二日南隴

八年趁得梅花發忽到憲前把一杯歲晚心情吾醉矣
人應問我數能來

書南礪壁間

晴日顛風落早霜雲隨嵐影暮蒼蒼梅梢吹下滿庭藥
安得一花橫處香

三巖

渡水尋山到碧巖不知身尚在人間霜天晴日青松下
借問誰能伴我閒

青巖

山儘深時氣儘清
雨雲收晚做秋晴
荒尋有寺通前境
分外身輕放脚行

紫巖

年年醉倒春風前
一片花光雜管絃
今日經行亂山裏
且尋僧話看茶煙

西巖

石迳却思烏石寺
寺巖不數赭亭山
一望遠村霜日白

酒隨吟句入高寒

望廬山

雲谷依然十二峯
遜翁曾在此山中
滿川風月今誰主
猿鶴哀鳴蕙帳空

一坐廬山近十年
經行空對此峯前
古書讀罷古心足
想見當年到聖賢

望雲峯

白雲堆裏見靈山
秋竹竿頭雨未乾
老眼不知閒景色

只疑人把畫圖看

樓西遠山數疊如屏障

寒煙淡木逼晴空
山外之山又不窮
倚遍高樓坐而立
心隨眼力付盃中

西牕望北高峯清甚

破曉輕寒忽滿樓
高峯雲亦未能收
蕭蕭便有風前葉
湖海谿山日夜流

去年間在北高峯
下邂逅示我竹枝歌

案此所云示竹

枝者不知為誰題上
當有脫誤今無可考

方家谷裏劉家寺書記忽云寧少耘吳人莫唱楚人曲
腸斷竹枝誰忍聞

謝昌甫到九峯

二父知翁二十年莫論上世往來賢寓邦更到村庵遠
不信翁心不黷然

靈井曾煩翁記文至今流水對荒墳孤兒自掃松間祭
人隔九泉聞不聞

二十日往九峯

九峯庵上懶翁泉鑿井已經三十年猶記翁來自扶杖
草根撥剔見涓涓

翁已仙去十七年樹林水鳥鳴風煙此泉以翁得名字
山蒼蒼而翁依然

泉上樹皆翁手種泉下池皆翁所遷遶池倚樹看泉水
泉邊池影樹清圓

雨中過春山

春風春雨滿春山桃李梨花草樹間時有片煙收不起
淡隨飛鳥去而還

教授推官把酒簷簷同登橫碧

不待他年說舊遊相逢杯酒懶回頭夜來腳踏溪橋路
正是山林一片秋

人已知予苦愛閒更邀遺佚對南山尋常城市官忙者
肯有心情到此間

夜同處晦霞山

案此詩三首其一首
見五律一見七律

道家山頂中秋月照我溪南野外心
莫把蕭閒作兒戲
為君清汎酒盃深

回步五嶺

五嶺經行敢憚勞從前此邑產賢豪
幾年始見新香火
占得青天白日高

過祝老南山

章泉佳處試徘徊日照松根石上苔
見說南山有幽隱
詩翁邀我過山來

登稅亭賦江天

推窗間為寫江天水色浮晴澹薄煙嗟我與君皆老矣
櫓聲帆影眼茫然

春江

半陰天氣近清明柳色花光盡不成行到遠村山盡處
一江春水縠紋平

春浦

正月
二日

日曛晴色斂霜華路入踈籬北客家一笑春情付杯酒

亂香飄蕩落梅花

綠葉陰陰啼杜鵑人家春浦野泉邊東風不忍羣芳歇
猶有殘紅墮酒船

山頭望江上

山外漲沙江氣黃天低雲日半浮光間來已是多歸思
更見江蒲過遠檣

潮落

萬疊流波一箭風幾多人在蕩搖中頃刻過來無別水

依前平地閣船蓬

初二日午後乘潮而上

一帆風已過桐江鷗鷺飛來不作雙回首長安在何許
亂雲吹雨滿蓬牕

水際

浪連風影浸垂雲冷氣吹林樹色分正是山中春夏接
老身時看白鷗羣

榴葉深青花驟紅踈踈籬上小亭東微蟲忽化飛蝴蝶

時鬪朝陽復趁風

青林收雨乍鳴蟬流水聲隨燕語

原缺

寂寂浮橋尚堆纜

蕪城橫處繫篷船

鷓鴣翼斑紅雜亂飛雲吹雨脚樹枝低開軒未午無風日

淡薄陰中理硯池

收卷殘書拂案塵花瓶初浸玉梳新呼童問我煎茶椀
飯了人來一具陳

雪溪

馮凌泉石負春山更着清灘下一灣
喚作雪溪殊不惡
只愁興盡我空還

南泉

白雲洞邊流水聲春風桃李鳥和鳴
客來掃塔無餘事
一宿僧房詩思生

瓢泉

鑿石為瓢意若何泉聲流出又風波
我來石上弄泉水
祇道希顏情味多

寺中石下泉池可掬

碧嶂清泉占上方小留連久更相羊市聲只隔門前水
付與烏飛帶夕陽

雨後池上

屋外山圍逼晚蒼步隨閒意老身涼雨收猶自吹殘點
濕起池荷一陣香

澗上

久晴何地不塵沙崦靄清深只數家橫著短橋籬落外

一溝秋水浸槐花

新涼吹得鬢斑斑老去身誰似我閒盡日微吟吟忽斷
但隨秋水看秋山

雨後蟬聲占夕陽樹疎林隙見雲光棲遲轉覺秋來好
山裏西風分外涼

晨起步過澗左

微醒未解凌晨起木影澗流風差差新蟬數聲過短壑
鄰家淨軒坐移時

小立澗上

上郭山前野路長一溝流漾入蒼茫
春風細雨踈籬晚
近眼梅花傍水香

望南高峯奇甚龍井正在其處

雲收寒日兩高峯
窄堵波連翠崦重
南北之間有龍井
十年前事一枝筇

龍井

龍井寒深碧水流
辯才詩已在山丘
蕭蕭石上風篁嶺

曾遇蘇仙秦少游

石井

碧山崑底水長流要與騷人勝
士遊霜氣吹寒浮落葉
為扶藜杖看清幽

白龍洞

西湖浪宕我能知却賦龍巖老古錐
便做詩家元不惡
華亭舉棹是因誰

飛泉洞

飛泉洞邊人意閒
白雲流影山空寒
角巾野服曳筇杖
誰着此身天地間

斷橋

湖山春靜子規啼
草滿汀州樹葉低
一陣暖風吹絮亂
又扶輿度柳橋西

梅陂

疏剔灘沙水面陂
四邊山木雨絲絲
既非朝市非城市
更著交朋來和詩

泂澗觀流

積潦奔湍響澗陰風回隱隱更沉沉如今又識臨流樂
未信濠梁有是心

扁舟放流而下

小舟回柁下彎碕煙草雲山風雨時暮夜歸來全似夢
石橋燈火見踈籬

山橋看水

破碧沿青翻紫苔浪聲風約去還來老身兩耳多塵土

立盡山橋不忍回

陪昌甫成甫尋泉看鶴而歸

魚計亭前放鶴歸
晚風吹葉正飛飛
策扶老健徐行後
傍水穿雲入翠微

曾甥同遊溪園

亂峯高下抹晴雲
眼力都無遠近分
綠葉亭臯新竹外
一巾華髮更斜曛

笑花香裏綠荷風
暑氣初回日未中
老去酒杯隨處好

戎葵尤占水邊紅

月下泊石湖橋

月明深夜越來溪，撐得船回泊短堤。
一片柳陰隨水綠，

山風吹起杜鵑啼。

來音離

十月十六日同器遠晚步童遊橋

濯錦江頭水自清，行人多少望橋行。
橋中不識橋邊景，橋下莫知橋上情。

濯錦江頭小佛廬，二三良友亦同居。
僧敲暮鼓朝鐘處，

舒卷一編賢聖書

過吳市

一尉西都梅子真歸來豈是總忘身
樓樓吳市門前卒
便道神仙乃若人

十一日自湖團歸

冬日雷鳴雨又多田間流水最奔波
民無稻食甚閒事
遲納苗時將奈何

二十六日過新田

春風吹我過新田
往者從容已數年
歷歷幽花伴芳草
故交情味倍依然

瑞雲堂

堆逕殘花落豔陽
通幽何處覓禪房
留連盡日南溪上
熱惱都忘眼界涼

昏昏煙暖帶蕪城
畫出僧坊一岸清
誰過橋來共幽討
碧羅紋裏小溪平

禪月臺邊洗墨池
春晴風裏看詩碑
同來不是紅塵客

香拂茶煙兩鬢吹

碧梧堂

枝幹亭亭葉葉疎
午陰收後晚涼初
客懷茗酒從容地
一色侵簷眼更虛

兩峯堂

兩峯堂上兩峯寒
不許他人俗眼看
我覺秋晴林路穩
步回幽處葉聲乾

德生堂為趙侍郎題

長夏湖邊何處涼
相君親寫德生堂
幾多魚鳥升沉去
留得風蓮十里香

泊舟碧瀾堂即白蘋洲也

碧瀾堂下白蘋洲
鳥影翩翩魚陣遊
想見太湖湖更好
西風吹浪一天秋

題向子山耐軒

相臣名德聖君稱
子子孫孫合敬承
百世衣冠如一日
堂堂心事待傳燈

同成季過余應卿竹軒

水源沙地日穿籬
破午清風動蕩之
不是輕陰過樽酒
故教行色到吾詩

晚過野趣軒

老來情緒惜春華
常在陰陰雨脚斜
鷓鴣聲中三月暮
園林何處覓殘花

判斷風光與物華
淋漓筆墨字橫斜
草分支逕通幽沼
竹外人間度柳花

夜過野趣軒小酌

十年燈火醉秋窻
君過閩山我淞江
今日持盃聽涼雨
依然簷溜夜淙淙

好山佳月近中秋
不信風光在小樓
倚盡危欄臨靜夜
一杯消得許多愁

小軒

春正濃時花已開
啼禽飛過綠陰來
小軒不是多情思
華髮尋芳懶獨回

題尹諫議西軒

此軒勝事有誰論
霜夜相從共一樽
歎息摩挲舊詩句
只今猶喜有曾孫

題趙鈐轄水閣

東南都會水晶宮
髣髴西湖醉眼中
楚尾寓廬同一笑
蒲萄新漲藕花風

濯纓閣

平生詩思弗浪與
一旦園池來寄題
得名當復主人勝

孺子之歌疇不知

風生微瀾湛蘋芷欲潔吾纓應為此吾纓已潔可奈何
只恐塵埃汚斯水

聞溪上喧然

半陰半雨半晴天老覺身閒盡願眠見說軍民做端午
競沽官酒鬪村船

題有山亭

胷中丘壑本無塵眼底青山意愈真亭占林園最高許

一杯風味景長新

又題浮丘亭

凌風高挹浮丘袂城郭山川正晚春不為小亭清坐久
老來隨處著閒身

文叔移築瑞石山上亭子

海氣漫漫江上風潮聲時度越山中且看移得新亭好
一任知名誰勇功

塵埃無地可乘風更落都城隘屋中天以江山振衣袂

小亭休沐見新功

歸鴈亭觀東坡詩

歸鴈亭前坐久之晴雲吹散碧參差江湖秋水已如許
慚愧仇池徒倚時

江祖石太白釣臺

平步飄然上玉堂也來江祖釣滄浪一生不得文章力
猶有虛名萬古光

南臺

案此詩二首其一見五言絕句

春登臺處溪山好
煖靄時吹淡淡風
試以閒身供酒琖
也知人與我能同

九日登南臺

臺高戲馬風吹帽
笑口開時挿菊歸
却憶東山攜妓飲
試呼紅袖著仙衣

殷勤餉酒山中客
獨酌遙知懶獨登
一片閒雲如可愛
清時誰曰味無能

禪月臺

貫休一去二百載猶得靈山照玉溪
不是臺高可留客
秋來人要覓詩題

尋得殘僧上月臺雨雲清薄未全開
茶甌坐久酒盃舉
桂樹落香黃菊來

涼風吹雨過城頭不近重陽不是秋
斷送清樽欺老病
吹臺供得幾多愁

蛩動一臺秋氣深酒浮燈影喚微吟
不禁騷雅多悲興
且與枯禪話息心

齋餘洗鉢施生臺此路間通一線開笑殺淵明沽酒遠
推將誰去挽誰來

致虛齋有葉少蘊曾公衮曾吉甫題句

我作高齋老石林題詩無復舊知音空青何在茶山遠
滿徑秋風生夕陰

重午溪廬

不能角黍泛菖蒲且攝閒心自讀書誰信騷經未終卷
又行山外到溪廬

懷人何處章泉水更復可憐潘永豐仕路屈身還政拙
山林養志得詩窮

臞庵

吳淞煙水是臞庵從昔行人入美談小艇延緣葦間過
市聲依舊隔橋南

珪瑩中借庵

水明山月更間身筆底風塵事事新賓主歷然應絕倒
鎮常輸與住庵人

山居

絕愛青山恨隔城，每登樓處動吟情。
老身一出京城後，却被山迷句不成。

餘杭訪趙蹈中郊居

九月二十八日

新霜晴日見郊居，草樹如斯亦有餘。
聞道又從湖外去，峯前回鴈記傳書。

史德脩所泊湖園正對嘯臺，坐久荷香四起，涼甚。

菱葉荷枝貼水香誰知五月此追涼一簾之外孤山寺
身在他鄉若故鄉

武林旅中小樓

西風蕭索雨聲愁長夜漫漫人倚樓莫上竹簾空悵望
綠楊煙暝水中流

二十日趙園

案詩二首
一見六言

水南下郭是南齋春雨閒情喚客來梅片柳條無藉在
晚香晴色醉深盃

十四日下郭趙園

老圃堂前看晚晴近溪時聽關船聲不知遠境干戈意
但覺憑軒筆硯情

永豐燈市

不分春晴雪乍銷等閒騎馬看元宵人言山縣無燈火
試與籠街過市橋

竹林七賢

西晉風流付竹林山王嵇阮本何心便饒江左夷吾在

回首紅塵河洛深

桐君祠用壁間韻

雨洗風梳萬木蒼
山容水色灩晴光
清明寒食春將晚
為覓桐君竚野航

春陰寂寂萬花中
花外聲傳古寺鐘
幾度潮生見潮落
尚餘情思在雲峯

臨安縣觀錢氏廟

浙水東西擁數州
錦衣玉食是王侯
如今石鏡荒荒白

廟屋欹斜草沒頭

衣錦軍前上冢時當年意氣懾吳兒
中原休問今何主
隨分笙歌燕樂嬉

五帝三王只為民幾曾欲貴自家身
英雄勢去死即已
尚肯貪生事別人

王伯規模有事功偏方乘間得爭雄
彼時應笑人成敗
覆轍爭知箇箇同

故宮渾不管興亡雜遝青山萬木蒼
人遠何從追往事

吳歌聲斷下牛羊

麒麟石笋尚縱橫
配食諸臣不得名
辛苦霸圖無別策
倉皇進奉怕天兵

霜入溪風過大橋
寺前來往遠迢迢
幾多二百年前事
只有蕭條樹葉飄

我是承平汝潁家
南來吳越在天涯
錢王故里驚如此
不忍思鄉老眼華

桃源山道者小庵

案此詩二首
其一見五絕

空山落葉響流泉窈窕崎嶇一徑邊
借問桃花今在否秦人元不愛山川

晚過無為寺寺前溪有鵝脾石

幾年欲到無為寺今日春風試一行
啼鳥數聲花裏老鵝脾波上夕陽明

崇福庵

一會靈山本宛然因師又見別逢禪
吾庵鐘鼓原無恙共看爐前一炷煙

崇福庵邊安靜泉往來漸次四十年道人只在山深處
手種青松已拂天

秋晴行到水晶山山近嵐光起滅間應有幽禪在其寺
避人甘占一生閒

翠寒雲鎖雨聲虛眼力無多意有餘忽過淺村橫落港
秋來惟恐負樵漁

夜長風雨撼空山老意幽懷儘自閒更是一庵人不到
紙屏藤枕竹爐間

雁聲初掠晚山秋一片煙寒雨未收
水落空江楓葉墮
岸明沙磧見虛舟

百法庵次載叔韻

雲落山根蔽遠江漸迷高樹到幽窻
須臾細雨風收處
盡出蒼洲白鳥雙

日遲無處着詩狂寄傲僧窻小小房
一陣楊花風澹蕩
試回清夢到池塘

春晚楊花撩亂開推窻情味興裴裒
風生但覺堂堂去

日照還看欸欸來

脚底樓臺盡管絃
長安人物信駢闐
夜深祇有疎更在
滿地月明光皎然

城都花賣已逢梅
不覺光陰日夜來
淺白深紅知幾許
薰風又見渚蓮開

從昔韶華不負人
軟紅塵裏帝城春
平高一望多楊柳
帶雨霑風處處新

潮上錢塘海舶行
片帆歌側度空明
顛風駭浪時常事

三老長年未必驚

翠潑春窻山數重回坡複領更高叢一聲啼鳥破幽夢
撫檻露華清曉中

地占高明因指顧萬人如蟻正卑喧江聲忽起晚風急
一片斜陽過眼前

日中為市晝昏昏萬代交馳不但今江浙之南數吳會
九天宮殿五雲深

夜涼河漢粲熒熒燈火天街更不停十里珠簾真昨夢

杜郎霜鬢已如星

登虎丘西庵

來訪西庵三畏堂
山林草樹只青蒼
劒池不洗行人恨
石上春風白日長

遊超果寺

春風山路散晴光
柳欲青青梅正香
試上籃輿載壺酒
也教人道去尋芳

峯臺山寺

振衣岑寧山頭寺煙抹平林眼欲迷我老不知身到此
依依渾似武陵谿

古城寺

柳陰花氣弄晴絲村北村南總見之人意不驚春動蕩
小來山寺一篇詩

應僊寺

山田渴雨民艱食國重農功遣吏來要使輕徭仍薄斂
坐令寒谷得春回

覺安寺

寒夜蕭蕭一枕清
小窻夢破竹風聲
不知身在紅塵裏
何處知今有宦情

過德清石壁故居二首

經行修竹小牕軒
閉戶看書記昔年
薄宦縈人塵眯目
空餘棲遁此心堅

世事身心水一杯
是非膠擾付蚊雷
吾生只合閒蕭散
多少年光節物摧

元要以半屋名來索句

西湖隨寓數椽下又與閒人作小詩便做心情嫌廣廈
我生如此儘相宜

青山寺

擾擾紛紛滿眼塵可憐光景逐時新
數聲啼鳥亂雲暮竹外一枝梅小春

常安寺

乍暖陰陰欲雨天滿陂春水浸山田
蛙聲一夜無人管

斷送閒愁到枕邊

廣平寺午炊

歲熟行田禾稻香
斷陂截港轉平岡
荒鷄遠近聲鳴午
踈雨微雲山短長

午炊祖教寺

青田白水插秧時
行盡山坡路轉低
初日漏雲時漲潤
踏歌聲裏子規啼

過草衣寺

莫聽秋堦促織兒吟風嘲雨也如嬉尋思老睡何曾熟
祇合淒涼為作詩

覆雨翻雲轉手間陰晴都付與秋山老年心緒偏宜醉
長日工夫只為閒

過金仙寺

陟逕沿岡上玉田穿墟涉港遇金仙黃雲割盡桑重綠
風撼輿籃但兀然

鷺湖僧房

青筍初成宿雨晴並簷啼鳥兩三聲
鵞湖峰下僧牕晚
一枕誰知夢亦清

僧房

炷香小閣聽山雨木葉風搖萬壑聲
更與野僧供茗事
是知身外有閒僧

僧牀午睡夢初成展轉輕安分外清
搔首起來神觀定
一牕山影正虛明

辯才塔院次致道韻

蘇趙從前說辯才
後人塵土不須猜
風篁嶺下青春晚
寂寂應知我獨來

子陵墓

閒來信脚到乾封
千古清名一夢中
却憶桐江客星閣
可憐田壠對秋風

觀李參政墓

石壁雲泉四十秋
兒時來往見風流
可堪松柏衣冠地
世事深沉懶轉頭

謁尹諫議墓

髣髴兒時拜德容
中州江左事難同
高泉宰木陰陰綠
白髮人來酹曉風

拜王處士墓

不見先生已六年
湖團只是舊山川
我攜茗酒奠荒草
寒雨吹風淚濕煙

拜呂舍人墓

生晚常嗟南北分
故家文獻少知聞
襄陽耆舊無龐老

獨對高墳看白雲

過南礮有懷成季之亡

西風原上脊令寒零落交遊我獨難
不信人間有生死菊花還作去年看

紛紛人物古猶今天壽衰榮共此生
秋冷南礮半溝水脩然唯見二難兄

紅葉初翻秋已深暮雲凝亂薄寒侵
排空忽斷飛鴻影誰識江湖萬里心

徐子顏挽章

信城多士固多才鄉老凋零安在哉自哭湖團王處士
每逢人逝有餘哀

被褐紗巾醉後歌尋常還往記婆娑
遊翁九日同登處
殘照吹紅玉水波

堅坐山頭十數年後來卜築轉蕭然
古梅風折籬傾倒
朱橘空垂屋角邊

門外曾聽刺史車也令鄉國重貧儒
傷心又賻君之葬

此事應須近日無

去冬孟守訪之
今冬賻之甚至

人營家室因妻子二者何能一一賢到底伶俜反無累
反乎真宅總如然

霜風漠漠葉闌斑積水陂池映淺山氣盡斂形陰野土
一生心事白雲間

覆雨翻雲以利名漢庭無日不公卿試言行志今誰是
却羨長貧過此生

宗人相送入山阿誰挽誰扶誰作歌既老無家且無子

不知君者謂如何

學錄徐大有
送終甚勞

常與交朋奉杖藜
放懷攜手動移時
蒼茫溪北溪南路
忍對交朋只自知

談天談佛共談仙
靜裏光陰不計年
幾度過家扶醉去
豈知今日見沉泉

欽定四庫全書

澗泉集卷二十

宋 韓虎 撰

詞

點絳脣

尋瑤草

山園春生探梅只道今年早暗香迎曉人與花能好
歲歲持杯天地同難老須吟嘯放開懷抱更約尋瑤草

又 王園

南陌柔桑粉牆低見誰家女燕飛鶯語依約提籃去

老覺多情夢也無分付君知否楚襄何處一段陽臺雨

又 五月二日和昌甫所寄併簡叔通

竹隱高深夏涼日有清風度
苧衣繩屨鶴髮空相顧

翠撲流烟又向溪翁去
青山路要當同住長占無塵處

又 席間和昌甫

銀筆金花斷腸有句閒揮掃
又還各了梅片陽春小

古往今來風味須才調
山林少這些襟袍輸與江東老

浣溪沙

寶鴨香銷酒未醒
錦衾春暖夢初驚
鬢雲掩亂玉釵橫
半怯夜寒褰綉幌
尚餘嬌困剔銀燈
粉痕微褪臉霞生

又十四日

百花叢裏試新粧
不許巫山枉斷腸
牡丹風颺曲聲長
寒日清明閒節序
綺窗朱戶少年場
燕泥香潤落空梁

又 澗上昌甫有詞

閒裏相看兩鬢秋
酒能沾醉雨能幽
吾廬何幸得翁留
世路儘教終易與
山林佳話恐難酬
人來人去亦知不

又 徐倅生朝

留得菖蒲酒一盃
與公今日壽筵開
靈山排闥送青來
須信南州高士後
持荷持節照蘇臺
瑞雲深處是三台

又 壽晁元默

湖海相逢更日邊
槐風蓮雨壽盃前
琴書圖畫水沉煙
共指金鑾當瀑直
不應彭澤尚回旋
今年初度想超然

又 生朝和昌甫韻

老覺空生易得年
閒居那復問旌旃
一邱春靜自回旋
翁善於人真美矣
我行於世轉乖然
清詞俾壽喜言傳

又 寄文叔生朝

江上新涼入酒盃
瑞芝堂祝壽筵開五樓百雉更崔嵬
勞來流離施菽麥
作成豐稔到田萊
便朝天去也裴裒

又 至日帶湖

愛日回春一線長
氤氲誰憶御爐香
孤城歲晚卧滄江
花底千官迎淑氣
湖陰十里寫晴光
賸拚華髮醉為鄉

又 野色軒看玉色木犀

月角珠庭映伏犀扶搖當上鳳凰池廣寒曾折最高枝
壯志還同諸葛膝清名還似紫芝眉梅花春壽酒行
遲

又 醉木犀

一曲西風醉木犀天香吹夢入瑤池釵橫猶記未開枝
花重嫩舒紅笑臉葉稀輕拂翠顰眉酒醒殘月雁聲
遲

又 試香羅

風軟湖光遠蕩磨春衫初試薄香羅踏青無計奈君何
莫笑老來多歲月肯教閒去少詩歌長安陌上有銅
駝

又同昌甫飲南池詞

屋上青山列晚雲水邊紅袂映斜暉柳陰荷氣簟湘紋
酒以歌長誰樂事詩成杯艷我離羣香銷涼意有南
薰

又元夕

分付心情作上元不知投老在林泉誰將村酒勸觥船
月影靜搖風柳外霜華寒浸雪梅邊醉歌烏帽忽醒
然

又清和風

買得船兒去下湖這些天氣近來無清和風裏綠楊初
酒不為渠閒放蕩詩應嫌我太麁疎酒徒詩社復何
如

又霜菊黃

霜後黃花向日開，老年情緒為何哉。
株株渾是手親栽，秋際有言揮玉塵。
冬來無夢遶金釵，相思一夜發窗梅。

又題美人畫卷

一曲霓裳舞未終，玉釵垂領髻雲濃。
夢回金殿月華東，燕子鶯兒情脉脉。
柳枝桃葉恨匆匆，羅襟空惹御香風。

又夜飲中明小軒

一曲青山映小池
林疎人靜月明時
相逢盃酒也相宜
醉眼不知春事少
歡情猶得漏聲遲
神仙何處夢魂飛

又小飲

一抹青山拍岸溪
麥雲將過笋初齊
不知何處水流西
小閣路頭吾欲醉
短篷船尾客同攜
酒邊華髮更題詩

又夜飲潘舍人家有客攜家妓來歌

小雨收晴作社寒月橋花院篆香殘杏腮桃臉黛眉彎
歌拂燕梁牽客恨醉臨鸞鏡怕人看良宵春夢遶屏
山

又過廬申之

梅葉陰陰占晚春博山香盡玉嶙峋茶甌酒椀試濡唇
閒裏常愁無伴侶老來不是有情人牡丹天氣惜芳
辰

菩薩蠻

和昌甫見招

歸來又喜山中約菊枝桂樹真宜酌興盡只觀山秋深
方閉關 會須追雅步策蹇或肩輿少待必能治膏肓
泉石醫

又 酒半戲成

秋林只共秋風老秋山却笑秋吟少恰恨有秋香清巖
秋夜涼 清秋須是酒結客秋知否醉筆寫成秋一秋
無復愁

又 同仲明飲

雪雲收盡晴風軟
小山春浪晴波遠
梅片已飛香
海棠紅試粧
人言詩易與
酒殘誰分付
不是沒心情
夕陽啼鳥聲

又 晚雲烘日

晚雲烘日南枝北
一杯未盡梅花曲
城郭小春回
暗香開未開
留連吾欲醉
醉眼紅塵外
多少老心情
景清人亦清

又 趙昌甫折黃巖梅來且寄菩薩蠻次韻賦之

隴頭無驛奚為朶巖前有折宜來墮風急雪雲溪詩清
滿意攜竹爐良夜飲飲竟煎僧茗梅以句深長得花
情未忘

又十五夜昌甫約賦寄劉簿

聚星亭下書堂水冬來欲問梅花使主撮是祠官人間
有底難章泉詞和去交道元如故轉眼歲將窮溪頭
鶴髮翁

又野趣觀梅

平生常為梅花醉數枝
滴滴香沾袂雪後月華明
膽瓶無限清
夜深燈影瘦飲盡杯中酒
明日景尤新人間都是春

又胡教生朝

南枝已見春消息今年為壽
方知得俾爾熾而昌流霞
浮暗香蓬壺清淺水笑指
雲堦喜高論有規模平戎
賦兩都

又壽昌甫生朝

今年是處梅花早分明開到章泉好兄弟壽盃同暗香
明月風 風流文物舊春意枝枝透兒姪定飛軒衣冠
與世傳

又 次韻昌甫見貽生朝

春來晴雨常相半水光風力花撩亂山北與山南行歌
或再三 誦君詩過日才大真盤屈壽我敢言酬相望
亦飲不

采桑子

梅詞

華林自是年年好月淡煙空依舊東風簫鼓吹香醉臉
融謝他詩侶還相覓雨雲蹤蹤不分情濃柳淺梅深
鬢鬢影鬆

卜筮子

初十日海棠春宋十一哥家飲

煙雨海棠花春夜沉沉酌寒食清明數日間人也須行
樂不怕笛聲長只怕兒家惡燭影紅酣寶篆香樓上
黃昏角

又生朝次坐客韻呈四叔

花底醉東風好景宜同壽海角天涯今幾春解后新豐
酒 內集記高陽南渡間回首但願長年飽飯休一笑
風塵表

謁金門

和昌甫

花肅肅楊柳三眠未足一棹溪山新漲綠舊歡無夢續
莫問杜鵑啼蜀只有江南水竹北客淒涼無伴獨春
山生草木

又

幽意熟吟盡春風自足
麥氣初生晴未燠相逢休問卜
畫出高山盤谷岩上飛雲相逐他日江東思渭北斷
絃誰為續

又 湖山春早

春尚早春入湖山漸好人去人來雖未老酒徒猶恨少
梅落桃開煙島日日更吹香草一片芳心空醉倒冷
雲藏落照

清平樂

次韻

蕭然在澗景色秋來冠幾縷明霞紅未斷矯首時時遐
觀回思五馬清遊分明前輩風流留作山間佳話更
誰愁上眉頭

又壽潘文叔

常思高致又見涼風起歡喜年時為壽意快寫山歌重
寄願公好德康寧青雲收取功名莫道而今官小吾
儒正要仁民

醉桃源

和昌甫

固窮齋裏話吾生言之必可行扶疎夏木既啼鶯更逢
漁計成多雅尚少時情滄浪漁父纓高歌寧與俗爭
鳴朱絃疏越聲

又 昌甫有曲名之濯纓因和

殘春風雨遶簷聲山空分外鳴閒來落珮倒冠纓尚餘
親舊情故人不見句還成又聽求友鶯濯纓一曲可
流行何須觀我生

又 和吳尉

柳嬌花妬燕鶯喧斷腸空眼穿一春風雨夜厭厭不聞
鐘鼓傳香冷曲屏羅帳掩園林誰與上秋千憶得年時
鳳枕日高猶醉眠

好事近

鄭倅生朝

臘雪映江梅冰玉更分風月袞袞紫樞家世慶誕彌時
節烘堂贏得戲萊衣春酒寶杯凸籍籍鄭莊人物要
漢庭勲業

又同仲至和探梅

湖上有孤山合把探梅詞刻清淺黃昏時候冷疎枝寒
色窗前忽到又如何一夜是相憶信道收香藏白報
春風消息

醉花春

書屏春

人已醉溪北溪南春意擊鼓吹簫花落未杏梅桃共李
水底魚龍驚起推枕月明千里伊呂衰翁徒爾耳我
懷猶不是

芙蓉曲

述舊

霓裳霞佩淡丰容
雲冷露華濃
喚起石丁歸去
冥冥仙仗崆峒
秋老花饒笑
清映小簾櫳
記取五城深處
鳳簫吹下天風

朝中措

寄元立

薰風雨節照稽山
三百里湖間
鏡上誰為賀老
棹船能伴官閒
今年壽日不妨吟嘯
還上清班
為寄長生新曲
齊眉想見酡顏

又

和吳子似

春濃人靜倦遊嬉
烟雨戰棠梨
翠徑亂紅無數頻啼枝
上黃鸝
小園流水濺濺處
綠遍謝家池
怨月恨花滋
味
泪痕猶染羅衣

又梅月圓詞

為茲春酒壽詩翁
我輩一尊同
香動梅梢圓月年年先
得東風
冰溪清淺流懷玉
蓮步謾從容
但願人生長
久揮絃目送飛鴻

又約和卿敬持醪為文叔生朝

山林鐘鼎似無同，舒卷有窮通。
洗出壺中三峽帝城嬴，
得從容。黃流亂注，狂瀾既倒，
砥柱能東。此際誕彌杯，
酒宜歌風虎雲龍。

眼兒媚

風寒

東風拂檻露猶寒，花重濕闌干。
淡雲殢日，晨光微透，簾幕香殘。
陰晴不定，瑤階潤，新恨覺心闌。
憑高望斷，綠楊南陌，無限關山。

又 下郭趙園詞

西溪迴合小青蒼梅雨弄殘陽意行隴畝景分亭院乳
燕春長酒深不用人歌嘯鉏圃試商量細稀菜甲旋
尋蔬笋一夢黃梁

攤破浣溪沙

楊梅

生與真妃姓字同家隨西子苧蘿東誰道玉肌寒起粟
酒能紅火齊燒空來上苑冰漿凝露在西宮不似荔
枝生處遠恨薰風

太常引第二體

臘前梅

小春時候臘前梅還知道為誰開應繞百千回夜色轉
參橫斗魁十分孤靜替伊愁絕片月共徘徊一陣暗
香來便覺得詩情有涯

西江月

晚春

聞道晚春時候暖風是處花飄遊人爭渡水南橋多少
池塘春草約馬誰聯玉勒釣魚應泛蘭船韶光何限
不逍遙輸與溪鷗野鳥

又四叔生朝

梅藥小春天氣橘林良月風光五雲邊近九霞觴美景
初無盡藏老矣相逢湖海年來遊遍瀟湘詩情滿眼
興何長贏得煙霄直上

少年遊第四體

玉蠟梅枝

閒尋杯酒清翻曲語相與送殘冬天地推移古今興替
斯道豈雷同明窗玉蠟梅枝好映情淡物華濃箇樣
風光別般滋味無夢聽飛鴻

探春令第二體

景龍燈

暗塵明月小桃枝舊家時情味問而今風轉蛾兒底有
誰把春衫試景龍燈火昇平世動長安歌吹這山城
不道人能記甚村酒偏教醉

鷓鴣天 離歌一疊

只唱離歌一疊休玉溪浮動木蘭舟如何又對雲煙晚
不道難禁草樹秋空脉脉忍悠悠綢繆終是轉綢繆
相思相見知何處記取新歡說舊遊

又次韻趙路分生朝所賦

便把山林寄此身也須詩酒屬吾人仙家舊是金堂士
吏隱新收玉局名 惟自樂不憂貧淵明談笑更清真
年年眉壽登高後醉帽常留菊滿簪

又 昌甫同明叔飲趙崇公家

莫道龐公不入州為誰歌酒也遲留襟期別乘真難事
領畧同遊豈易謀 他擾擾自悠悠香浮茉莉笑花頭
一簾雲影催詩雨喚起佳人無限愁

又 看瑞香

看了香梅看瑞香月橋風檻更雲窗不知是有春多少
玉水靈山醉幾場閒蝶夢褪蜂黃儘溫柔處儘端相
珠簾十里揚州路贏得潘郎兩鬢霜

又 十二月二十二日

雪到飛春若素期柳條吹送落梅枝冰壺表裏誰能賦
玉鑑圓明且屈卮村舍北郡樓西治中風調只心知
不堪野老關門醉想見山公倒載時

小重山

雲影收晴雨外明
碧溪春灩灩落花平
鶯聲催我過橋
行人何在詩酒淡
心情閒裏興還生
錦鱗題尺素有
誰能草邊芳柳邊
城歸來也清夢遶
山屏

虞美人

代兒壽黃靖州

曉來一陣催花雨
正桃李橫塘處
笙歌簾幕燕鶯喧
春在人間不老穀
城僊瀟湘圖畫
迎千騎襦袴歡
聲起功名風虎慶
雲龍更看萬釘橫
帶繫金狨

又趙倅酌別靈山閣

送君報最登朝路初整曹裝處又因杯酒見餘情涼雨
靈山閣上月初晴 醺然領客襟懷底消得闌干倚風
流別乘我依歸清譽冰溪棠蔭綠漪漪

鵲橋仙

七夕詞

雨意生涼雲容催暮畫樓人倚闌干處柳邊新月已微
明銀潢隱隱疎星渡 今古佳期漫傳牛女一杯試與
尋新句幽懷冷眼是青山舊懽往恨渾無據

又聞舉金風玉露相逢之曲因賦

詩非漫與酒非無
筭都是悲秋興
在與君觴詠欲如何
畫不就新涼境界
微雲抹月斜河迴
斗隱隱奇奇怪
怪剛風九萬舞
瑶林甚些少
人間利害

又紅梅已謝

紅梅已謝杏花開
也一片海棠猶未
春風吹我帶湖煙
甚恰限新晴天氣
黃昏樓上燭花影
裏拚得那回滋
味暗塵絃索拂
纖纖夢留取巫山十二

一剪梅

蠟梅

一朵梅花百和香
淺色春風別樣官
粧西湖衣鉢更難
忘
雪意江天渾斷人腸
清夜橫斜燭影窗
羸得相思魂夢悠
揚玉溪山外水雲
鄉茅舍疎籬不換
金章

又送馮德英

說著相思夢亦愁
芳草斜陽春滿秦
樓樓前新綠水西
流一曲陽關分付
眉頭多少風流事
已休粉薄香濃怕
見綢繆淡雲籠月
小庭幽明日山長
清恨悠悠

又醉中

醉倒城中不過谿谿外無塵惟掩柴扉水浮橋漾翠煙
霏一片閒情能幾人知 留飲君家絮帽欹爆竹聲中
萬事如斯梅催春動已熹微爾既能來我亦何疑

蝶戀花

次尹一韻

未就丹砂須九轉誰把新詞歌遶梁塵拍拍韶華春
意滿揆予初度文何健 恰是山花汀草遠獨樂園林
不夢笙簫殿靈氣仙才非小見霞杯謾道蟠桃獻

又

千葉香梅春在手日薄簾櫳花影遮前後小立徐行還
易久微吟莫厭傷多酒拾翠流紅絃管透望斷青青
休問行人柳往事如雲如夢否連天芳草驚依舊

又野趣軒看玉色木犀

斜日清霜山薄暮行到橋東林竹疑無路小院橫牕香
暝霧膽瓶曲几花如雨細酌心情因少駐九萬剛風
寒影吹瓊素不是月宮那有許霓裳舞徹凌波步

又細雨吹池沼

盡道今年春較早梅與人情覺得梅偏好一樹南礮香
未老春風已自生芳草 來自城中猶帶曉行到君家
細雨吹池沼悵望沙坑須會到玉溪此意年時少

海月謠

送趙永興宰

晚秋煙渚更舟倚蕭蕭雨水痕清汜迤邐漸整雲帆西
去三疊陽關留下別離緒 溪南一塢風月誰為主酒
徒詩社自此冷落宵懷塵土目送鴻飛莫聽數聲柔櫓

臨江仙

閨怨

脆管繁絃無覓處小樓空掩遙山柳絲直下曲欄干海
棠紅欲褪玉釧怯春衫 殢酒不成芳信斷社寒新燕
呢喃雕盤慵整寶香殘綺疏明薄暮簾外雨潺潺

又書屏春

羅帳畫屏新夢悄綠窗慵起香殘重簾生怕倚欄干春
風吹玉水春雪滿靈山 梁燕未來歸鴈動海棠纔帶
紅酣酒愁花恨霎時間煙雲催薄暮煙雨濕輕寒

又和荅昌甫見寄生朝

滿眼春生梅柳意山居清聽風泉又因初度說今年華
顛相望處新曲忽來前自笑一周閒甲子何為佞佛
貪仙如翁輩行敢隨肩徒知言語妙懽喜向誰傳

又為顧致堯生日

難老一盃春酒美主人玉鑑清秋九華山下共追遊朝
來多爽氣都向筆端收臺閣功名歸去好便應衮衮
公侯未妨含笑看吳鉤當年佳夢日和氣瑞光浮

又周國正生朝

寒食清明春事好公家霽月光風年時猶記雨聲中州
侯陳樂舞法從酒盃同坐上王楊雖自散醪醕依舊
香濃待將詩易壽無窮鳶飛魚躍矣風虎更雲龍

江城子

德久同醉子似出新置佐酒和德久詞

天孫應為織雲裳試宮粧問劉郎湖上波寒依舊遠山
蒼自是老來心事嬾空落拓少年場揮毫閒與細端
相記嚴揚陋蘓張興到一杯微醉亦成章回首片帆西
去也何日更共清狂

又村意遠

雪銷霜入小溪舟。試浮游上山頭。薄薄寒烟依舊未全收。問道梅花開也未。吟不盡、一生愁。襟懷如此老還休。懶凝眸。轉深幽。詩罷一眉新月又如鉤。臘後春前村意遠。回棹穩、水西流。

洞仙歌第二體

次韻斯遠所賦清溪一曲

溪山好處贏得題新曲。待足人生甚時足。問臨流清味。倚遍斜暉。應似畫小景生綃一幅。漁舟聲欸乃。巖上

雲飛杳杳歸鴉去鴻逐任當年伊呂談笑興王爭敢恁
閒眠野宿待雪天月夜我還來醉瀟灑清幽那些兒屋

滿江紅

和趙公明

五老峯前九江上曾生仙客相邂逅貴池亭上定交金
石我輩風流宜嘯咏官曹塵冗從煎逼且簿書叢裏舉
清觴偷閒日 同一笑當今夕梅正好香浮白相忘爾
汝醉巾沾濕已向瓊樓誇意態似聞金殿傳消息想君
今歸去際風雲應相憶

又 陳玉局生朝

歸錦堂成雲漢上天垂新畫有朱顏綠鬢禁林仙客玉
局暫從香火社金龜未報文章力看彤庭賜第別承恩
居君側 斑衣戲蟠桃摘翠袖倚歌檀拍正祥開初度
頌聲千百又是臘前梅態度幾多春近花消息想明年
今日醉西湖尤輝赫

滿庭芳 王寺簿生朝

點點淮山迢迢江水分明別是風光地靈人傑星斗爛

文章初度充閭佳氣當年瑞應弄珪璋薰絃奏涼宵寶
月玉井藕花香清真如逸少蘭亭修竹曲水流觴想
醉鄉日水地久天長小駐屏星懷玉飛鳧鵲元在鴛行
功名事雲龍風虎行矣佩金章

水調歌頭

坐間有傷仲至且懷昌甫因呈張宰

新月已如許我問帶湖梅人問題句盡得浮湫酒盈杯
拓落豪英滿坐爛漫風騷連紙天外鳳凰來只怕輕辜
負莫待巧安排空翠滴寒爽矣晚佳哉為君絕倒折

盡千樹玉蓓堆眇眇章泉好在寂寂盧泉仙去今古付
樽罍拍手見花木放眼記莓苔

又和石侔壽湯守

玉水靈山地燕寢亦書功邦人耆老誕彌佳節以詞通
爾豈知吾豈弟我乃因君譚笑祝壽酒盃同簫鼓少人
會歌舞為誰容觀坐客驚野老筆如風篴般醺唱詔
回應上玉華東多少家傳經濟留與孫謀持守出處信
何窮喚起千年調分付一車公

又清明嚴瀨

今古釣臺下行客繫扁舟何似雲山千疊亦東遊我欲
停橈一醉與寫平生幽憤橫管更清謳小上客星閣短
鬢獨搔頭風乍起煙未斂雨初收一年花事數聲鶯
鴂欲春休弔古懷賢情味只有浮名如故誰復識羊裘
賴得玄英隱相望此溪流

又晁子應三十八丈見過因張德廣對木犀小
飲次德廣韻

明月到花影把酒對香紅此情飄灑但覺清景滿簾櫳

人被好花相惱花亦知人韻勝佳處本同風揮手謝塵
網舉袂步蟾宮 秋已半幽澗側亂山中故人過我終
夕乘興可千鍾賴有曲江才子坐上平章花月不管老
英雄心事將何事醉語又匆匆

水龍吟

七月二十六日信守生朝

從來江左夷吾大名迥出諸公右金堂玉室瑤林瓊樹
龍麟蟠走志在神臯氣雄雲夢十吞八九問三槐盛事
當年初度人應羨青氈舊說與文章太守慶千秋好

為親壽冰桃碧藕霞裾月珮鶯鶯歌奏雨熟西疇星躔
南極寶香凝晝趁新涼便約乘雲繞日飲天漿酒

冰玉風月

上太守

慶文章太守燕寢凝香誕彌佳節庾嶺歸來又經年梅
發棋酒心情笙歌滋味便合朝天闕玉作山前冰為水
際幾多風月綠鬢朱顏浩然相對自是中原舊家人
物鵷鷺班回尚記陪清切好把宵蟠萬卷談笑了濟時
勳業錦幄初溫寶杯深勸舞迴香雪

賀新郎

十三日小園梅枝微紅點綴便覺可句

梅蕊依稀矣歲華深脩然但把杖藜閒倚山遶荒林紅
葉下落日孤城煙水意興寄云何則是底事疎枝橫絕
峭未吹香便與花相似不忍折為之喜寒鴉萬點霜
風起正人家園收芋栗小槽初美欲醉可誰因一飲擬
賦纔成又止老態度渾侵髮齒摸索孤根春在否任紅
紅白白皆桃李空爛漫豈能爾

雜文

故右武衛大將軍代州刺史世肱可贈安州觀
察使追封陸安侯制

勅朕承祖宗之訓序骨肉之親生以官列于朝所以綴恩
也沒以爵告于第所以申哀也具官某被服忠厚造次儒
雅在幼而有立志居佚而無流心稟生不融聞訃增悼茲予
贈爾以廉車之職侯印之重尚冀褒渥足慰瑩魂可

昌甫銅雀塼研銘之七言

鄴臺奏妓曹劉迹猶把殘塼裁研式匪金斯隱乎星

匪陶斯陶潤於石一泓一置漳泉深月明鳥飛恍如昔
求志齋銘

予友王德修築室于其鄉前臨清溪背負長林羣峯駢
羅風氣佳甚又為一齋以待賓朋之晤語予過而愛之
曰是齋得無名乎德修曰吾老矣惟是頃遊和靖先生
之門見其以三畏名其堂者嘗欲榜於吾之舍以無忘
先生之訓是齋尚何名子盍為我言之予曰我之不才
蓋亦蚤聞先生之緒餘也吾子實從之稽山之下且送

其終焉聞益廣矣歸隱于田間獨善其身以自誨于子弟而予濫官于朝尚竊間散之祿視子為甚愧其又奚言雖然昔吾夫子有云隱居以求其志者吾子殆庶幾乎請以求志名則何如德修曰古之為友者伯牙能琴子期善聽也故知其志在高山與流水子知吾之志安在在將何求予曰然非此之謂也吾夫子固嘗俾弟子各言其志而子路亦聞夫子之志矣皆道其所欲為也惟隱居而求志夫子乃謂未見其人意蓋有所深歎繼

言行義以達其道則志之所求者非道也歟夫道者果何事也夫子嘗言曰士志于道而耻惡衣惡食者未足與議也又曰志于道據于德依于仁游于藝逮其自謂則曰我非生而知之好古敏以求之者而孟子亦謂求則得之抑在茲乎自道之失其傳也聖人正其心至于平天下者岐以為二死生動靜莫識其源天地萬物莫明其理舉天下溺于虛無莽沆以為道況于富貴貧賤之間喜怒哀樂之際孰知所謂不可須臾離者千歲而

下思夫子未見之人道其有在吾徒其可忘之後學之
士期以語之則吾先生之教也

案此文是銘之序據題
目當別有銘今闕



